



## 番鴨公

該隻最大隻个番鴨公又同厥翼閉開，頸根擱長長，在該噉噉滾愛號飼料。

見擺係主人來農場餵食，還毋曾行兼，農場裡背个雞鴨，早就嘜嘜喊喊跔等佢个腳步行一路來。該豬筲正倒啊滿，就做得看著農場裡肚最大隻个番鴨公，惡蹶蹶仔在該閉翼愛同大家人逐走，好分自家定定仔享受。

脣口該兜過細隻个鴨仔，早就分佢逐走，過毋驚佢个就睇等。番鴨公係無注意个時節，佢等就會吮一下飼料。輒輒看著其他个鴨仔正吮啊過，佢就用厥含等滿滿飼料个嘴去啄人。本成愛吞落脰个飼料，佢一擘嘴，嘎跌到哪都係。該兜分佢啄著个鴨仔，一下仔痛起來，乜跔等「哇」一聲，嘴項个料仔也跌下來也。佢等麼人都無食著，就淨看著該兜鴨仔在該鬥來鬥去。

這時節，農場裡背个雞仔早就又走又飛，屏啊毋知哪去也。等過也一站仔，該兜鴨仔爭嘖食飽過後，佢等正行兼來豬筲這。佢等目珠利利，緊尋跌啊在地泥項个料仔，用觜一粒一粒啄起來食。有兜料仔跌啊蟻公竇个空口，佢等就用腳去蹶。久久仔，無定著還啄得著一、兩隻蟻公來加菜。因為不時愛走分鴨仔逐，這兜雞仔又走又飛，翼胛早就訓練啊蓋有力，一撥就做得飛上半層樓恁高个樹桄，身腳十分活板。

在豬筲脣絡食，大家不時就分番鴨公欺負。鴨仔也好、雞仔乜無放過，佢麼人都翕。大雞公去同佢韶詳，照常分佢逐歸來，半息都無好參詳。

該日仔，恁該死，隔壁个大狗仔跋過籬笆。雞仔看啊著狗仔跋過來，一下仔就蹶等腳飛啊起來，隻隻都想愛飛到樹桄頂項去屏。狗仔看著農場裡背恁多鴨仔、雞仔，一下仔興頭擎來也，就想愛擒上去。該兜雞鴨，走个走、飛个飛，農場裡背一下仔就像開運動會。同一般走相逐無相同个係，走輸狗仔，定著就會無命也！

大家人走到無命樣仔，一粒大石頭播啊來，堵堵好擲著狗仔个肚屎。該隻狗仔肚屎痛到「嘔(eu)」一聲，捋尾仔跋過籬笆，瀉走也。主人出現也，救也大家人一條命。這時節番鴨公大聲噉雞仔：「就淨曉得無命个走啊飛起來，麼个都掙力毋著。」雞仔聽著，心肚譴啊無氣好出，又毋知愛仰仔來反駁。

過一站仔，鴨嫲在孵卵，有一尾蛇哥趁過來想愛食鴨卵。鴨嫲哇哇滾走開竇，番鴨公看著就想愛去保護卵。等佢行到卵竇該，該尾蛇哥探起頸根、凸出舌嫲，目珠金金看等番鴨公。這時節佢就淨敢在脣口譴啊呵呵滾緊喊，伸个麼个都毋敢。顛倒係該兜雞仔看著恁仔，閉開翼、飛上飛下，咯咯咯愛來嚇蛇哥。

毋知係雞仔个聲說，抑係好得主人恁堵好逐來，蛇哥走核也，竇項个卵半粒都無少。鴨嫲暢啊同雞仔佢等講：「好得有你等掙手，蛇哥正逐得走，卵正無少。」這時節番鴨公正知，雞仔佢等細隻罔細隻，團結起來乜盡有力。

下後，見係主人來餵食个時節，番鴨公就淨會喊等「好、好」，毋敢再哇哇滾逐人也！

作者：陳志寧

### ☆詞彙學習☆

【噉噉滾】ve ve gun`：大聲的喊著。

【號】ho：占有。

【見擺】gian bai`：每一次。

【爭嘖】zang` sai`：爭奪食物來吃。

【豬筲】zu` deu`：置放飼料的器皿。

【韶詳】seu` xiong`：好好的商量。

【捋尾仔】lod mi` e`：夾著尾巴的樣子。

【見係】gian he`：每一次。